

上海图书馆

登记号码

00910993

張氏統宗世譜詔勅誥表卷之一

漢封富平侯安世公并三子詔

詔曰朕褒有德賞有功古今之通義也車騎將軍光祿勳富平侯張安世宿衛中正宣德明恩勤勞

國家守職秉義以安宗廟益封萬六百戶功次大將軍光安世子千秋延壽彭祖皆中郎將侍中

本始元年乙卯月

日行

漢贈故掖庭令賀公揚都哀侯并封弟子孫詔

詔曰朕微眇時故掖庭令張賀輔道

朕躬脩文學經術恩惠卓異厥功茂焉詩云無言不讐無德不報其賀弟子侍中關內侯彭祖為揚都侯賜賀謚曰揚都哀

侯孤孫霸年七歲拜散騎中郎將賜爵關內侯食邑三百戶

本始二年三月

日行

漢追贈故廣陵太守綱公并封子詔

詔曰故廣陵太守張綱大臣之苗裔剖符統務正身導下班宣
德信降集劇賊張嬰萬人息干戈之役濟蒸庶之困未升顯
爵不幸早卒嬰等緣袞若喪考妣

朕甚愍焉拜綱子續爲郎中賜錢百萬

永康元年正月

日行

晉加封關內侯華公廣武縣侯并封子詔

詔曰尚書關內侯張華前與故太傅羊祜共創大計遂典掌軍事部分諸方筭定權畧運籌決勝有謨謀之勲其進封爲廣武縣侯贈邑萬戶封子一人爲亭侯千五百戶賜絹萬疋

太康元年二月

日行

晉追封故司空壯武公華公侍中中書監司空廣武侯詔

詔曰朕愛惡相攻佞邪醜正自古而有故司空壯武公張華竭其忠貞思翼朝政謨謀之勲每事賴之前次華弼濟之功宜同封建而華固讓至于八九深陳大制不可得爾終有顛敗危辱之慮辭義懇誠足勸遠近華之至心誓于神明其復華侍中中書監司空公廣武侯及所沒財物與印綬策遣使吊

祭之

太安元年正月

日行

梁贈駙馬都尉利亭侯纘公詔

詔曰張纘外氏英華朝中領袖司空已後名冠范陽可贈纘爲

尚書僕射

天監五年正月

日行

唐游朝公辭權吏部不允詔

詔曰朝廷從臣咸由德選文章常伯專用老成卿學術造乎道
原智識通乎國體精明之機拒吏奸於冗劇正大之論發經
誼於燕閑嗚於賢猷對此亨運叅稽民譽宜居八座之聯登
冠銓衡遂據群才之會已頒成命難循謙懷卿宜從之毋替
朕命

天寶二年二月

日行

唐恤忠臣英才英廷二公并封子詔

詔曰張英才職守潭州冒鋒趕駕張英廷職充奕使抵賊捐軀
忠義著聞可無恤典宜贈官一等并錄其家魂其有知欽茲
寵命可授其子紹爲興化縣丞

光啓二年正月

日行

漢贈晉侯良公勅

皇帝勅曰聖王定天下必得賢臣以輔之是以左股右肱設官分職今照國師張良才高德贍忠輔于

朕身難報往來之宏勞是命臣某捧金衣一襲拜先生之門報生之德俾張之子孫承其職業以副

朕意汝往欽我毋替

朕命

天漢九年春三月

日行

齊加封吳郡太守岱公護軍加給事中勅

皇帝勅曰太郡任重乃未欲回換但總戎務殷宜須望實今用卿為護軍加給事中

建元己未年正月

日行

拜

唐追贈金吾志和公父游朝公尚書勅

皇帝勅曰立人之道各親其族故廟焉以事其先馭臣之儀必有等威故貴者特異其數

朕叨承天命德不勝位唯是相臣禋其父考於禮不亦重乎功臣金紫光祿大夫左金吾大將軍張志和故父游朝潛德內充英稱遐驚垂清白之訓奕世其承涵積累之祥哲人斯復方一相以處外舉三事以褒先會郊疇之上儀進師垣之峻秩陞途雖闕尚鑒恩靈可加贈太師尚書

大曆丙午春三月

日行

唐追贈金吾志和公母李夫人塋墓勅

皇帝勅曰悅懌美女其賢不出於閨門沐浴

君恩所遠必通於泉壤非爾後昆之鼎貴曷其奕代以有光功
臣金紫光祿大夫左金吾大將軍張志和故母碩人李氏令
德溫恭徽音婉婉克配君子蘊德美於象筭篤裕賢即開祉
祥於機席爰因初命載賜湛恩乃頒璽誥之華有煒魚軒之
盛介茲東帛殫爾榮魂吉壤新封恩光弗替可加贈秦國賢
德夫人賜表白十段白金百鎰銅錢二千四百文以爲榮葬
之資奉

制墳高一丈濶八十步各去四十步

廣德甲辰冬十二月

欽差禮部主事黃廷金 賚

知欽州事守臣馬漢清 祭

知縣事 謝光庭 祭

明封贈北京府軍後衛經歷司經歷慎公父母勅
奉

天承運

皇帝勅曰國家推恩臣下必及其親者所以重本而勸孝也爾張克祥乃府軍後衛經歷司經歷慎之父慶鍾厥子祿養乃遠揆厥本源宜錫褒命茲特贈爾爲徵仕郎府軍後衛經歷司經歷九原有知服斯卹寵

勅曰孝子之愛親靡有存沒之間故朝廷推恩群臣恒必及之所以體其心而重大倫也爾吳氏乃府軍後衛經歷司經歷張慎之母有子能官祿不逮養揆其所自卹典宜頒茲特贈爲孺人尚克欽承永賁幽壤

勅命

弘治三年五月初四日

之寶

明錫封北京府軍後衛經歷司經歷慎公夫婦勅

奉

天承運

皇帝勅曰國家兵衛之設所以分理軍政長貳皆以武臣處之而其幕職則必得儒流乃克有濟爾府軍後衛經歷司經歷張慎釋褐成均擢任今職歷年滋久勤慎可嘉宜錫寵恩以旌勞勩是用進爾階徵仕卽賜之勅命以爲爾榮其益盡乃心毋怠厥職欽哉


勅曰夫婦人倫之始故朝廷推恩群臣命必及之爾府軍後衛

經歷司經歷張慎妻黃氏克敦婦道善相其夫夫既能官爾
宜借貴茲特封為孺人祇服榮恩永光閨闈

勅命

弘治三年五月初四日

之寶



明封贈北京太僕寺寺丞桓公父母勅
奉

天承運

皇帝勅曰父母之教子期于成名子之孝親志于顯耀肆國家推
恩之典必有以體其盡孝之心而酌其善教之功也爾張瀛
乃太僕寺寺丞桓之父敦德履仁晦跡弗耀慶鍾令子效用
于朝推厥本源宜申卹典茲特贈爾爲丞德郎太僕寺寺丞
靈冥不昧服此休嘉

勅曰孝莫大于顯揚恩莫隆于褒寵肆朝廷推恩于臣下而榮
必及其親者所以崇孝理而示激勸也爾汪氏乃太僕寺寺
丞張桓之母善著閨門訓成賢子訴惟所自可緩褒章茲特
封爲太安人服此茂恩永綏祿養

勅命

弘治五年九月二十一日

之寶

明錫封北京太僕寺寺丞桓公夫婦勅

奉

天承運

皇帝勅曰太僕寺掌廐牧孳息之數以供兵戎之用厥任匪輕爲
佐貳者必得廉謹練達之士乃克稱焉爾太僕寺寺丞張桓
明經登第宰邑著稱迨進今官益彰善言宜頒寵命以示旌
褒用進爾階承德郎錫之勅命以爲爾榮爾其益殫乃心盡
迺職俾焉政修舉庶副朕任用之意欽哉

勅命

初任福建泉州府惠安縣知縣

二任今職


之寶

勅曰人倫始于夫婦厥化本于閨門朝廷褒寵臣下必及其配者所以重倫理而崇化本也爾太僕寺寺丞張桓妻鄭氏克勤內助以相其夫夫既顯榮爾宜偕貴茲特封為安人服此榮恩永光閨闈

勅命

弘治五年九月二十一日

之寶



明封贈南京大理寺左寺左評事士鎬公父母勅

奉

天承運

皇帝勅曰旌獎賢能乃朝廷之著典顯揚親德亦人子之至情矧
惟法寺之英乂著賢勞之績肆推恩命實倍常倫爾張思佐
乃南京大理寺左寺左評事士鎬之父樸質不華安恬有守
敦行信義賢聲著於鄉評撫恤孤嫠仁惠施於族黨謂光前
裕後莫大乎儒猷故涉文窮經篤成乎詰嗣祿養方隆於昂
釜褒章宜被乎絲綸茲特封爲文林郎南京大理寺左寺左
評事肇膺冠服之華安享桑榆之樂

勅曰教養兼隆毋德不殊於父寵榮均被君心實体乎臣茲惟
禮典之常豈有幽明之間爾程氏乃南京大理寺左寺左評

事張士鎬之母性惟勤儉行特端莊秉正道以相夫化行宗
黨佐義方以訓子榮擢廷評顧鼎釜之養既違而風木之懷
彌切宜頒卹典以慰孝思茲特贈爲孺人庶懿靈之有知服
休光于無斁

勅命

正德十年閏四月十二日

之寶

明錫封南京大理寺左寺左評事士鎬公夫婦勅
奉

天承運

皇帝勅曰國家置三法司而大理與其間分兩屬寺而評事爲之
佐所以叅稽衆議互考群疑辨已具之獄而不狃於成審未
用之刑而求免於悔舊都所在令式攸同再南京大理寺左
寺左評事張士鎬儒業起家甲科登第列官卿寺佐理邦刑
訊讞詳明執法有裨於庶獄操持清慎檢身無愧於四知歷
歲寢深課功惟最爰稽彞典用示褒恩茲特進爾階文林郎
錫之勅命於戲奉公持正固聽訟之恒規謹始保終亦守官
之要道尚加旌懋以俟登崇欽哉

勅命

初任大理寺右寺右評事

二任今職

之寶

勅曰親能樹立每資內助之良朝廷褒封爰有旁推之命蓋風
化莫先於閨閫肆因恩修載於彙章南京大理寺左寺左評
事張士錫妻江氏淑慎有常柔嘉維則秀鐘舊族德媿英流
禮義相成志不違乎姆訓儉勤自勵動必協於家規婦道既
修褒章宜錫用旌內助式耀中閨茲特封爲孺人尚敦祗慎
之風益迓嘉祥之至

勅命

正德十年閏四月十二日

之寶

唐錫監察御史游朝公誥

皇帝制曰列職栢臺實有關於風紀掄材楓陛久未愜於

朕心今得其人宜膺是選具官張游朝性資明敏議論宏深代
武臣而獻策幸無晚見之嗟效前哲以輔忠庶有將來之望
今特命爾爲監察御史爾尚公心執法正己立朝白簡凝霜
莫負激揚之任豸冠耀日用彰彈擊之名汝往欽哉毋替
朕命

奉制

開元辛未三月壬辰日

行

之寶

唐錫左金吾志和公金紫光祿大夫誥

皇帝制曰朕蓋聞古之帝王茅茨土階曾無儀衛之嚴後世

皇朝鹵簿壑輿始置臣隣之役雖固多備肘腋爪牙之壯士而

實統夫忠良文武之全才左金吾張志和氣節不群文章該

博南宮獻策殆幾弱冠之年北闕賦詩益中大廷之選值我

國家之多事致爾才用之久淹吞臣子之勤勞寔

朕心之簡在今特加爾金紫光祿大夫賜奴婢二人於乎褒崇

之典寵錫之章固申重于今日手足之投腹心之報尚刻鑿

于將來欽我訓言共圖治理

奉制

至德二年正月十五日知制誥臣蘇源明行

之寶

明封贈南京大理寺左評事張芝公父母勅
奉

天承運

聖帝勅曰家教之善因子貴而可徵錫命之榮逮親存為尤甚惟
茲兩得自古為難爾張初乃南京大理寺左寺左評事芝之
父郡邑遺才立園高蹈居鄉尚義素敦長者之風教子成名
早擅甲科之美賢勞有自恩典宜推茲特封為文林郎南京
大理寺左寺左評事茂膺冠服之華益享桑榆之樂

勅曰毋德之成義實兼乎教育國恩之錫禮特重於褒崇肆緣
報德之情証示推封之命爾胡氏乃南京大理寺左寺左評
事張芝之母儉勤兼至慈惠夙全篤成令子之才克舉廷評
之職祿養方隆于鼎釜褒章宜畀乎絲綸茲特封為孺人諒

壽考之有徵服恩光于未艾

勅命

弘治十二年七月十九日

之寶

明錫封南京大理寺左評事張芝公并妻勅

奉

天承運

皇帝勅曰國家備三法司而大理與其關置兩屬寺而評事為之
佐所以叅稽衆議互考群疑辨已具之獄而不徂于成審未
用之刑而求免于悔舊都所在令式攸同爾南京大理寺左

寺左評事張芝儒業起家甲科登第首擢迂評之職實分留
務之司訊讞精明操持清慎賢勞既積美譽用彰肆當布德
之時預示褒嘉之寵茲特進尔階文林郎錫之勅命於戲以
可濟否必左右之相資為死求生庶彼此之無憾益殫尔力

勉副訓詞欽哉

勅曰臣有事君之功家隨以顯妻有從夫之義身與其榮國典
具存彝倫攸繫南京大理寺左寺左評事張芝妻黃氏出自
名族嬪于儒門順正從夫志不違于姆訓儉勤率下動必協
於家規爰錫褒章用旌賢淑茲特封為孺人尚其祇奉益迓
寵光

勅命

弘治十二年七月十九日

之寶

明勅義民安公勅


勅江西饒州樂平縣民張安

國家施仁養民為首爾能出稻穀壹千五百石用助賑濟有司以聞朕用嘉之今遣人賚勅諭爾勞以羊酒旌為義民仍免本戶雜汎差役三年尚允蹈忠厚表勵鄉俗用副褒嘉之意欽哉故勅

廣 運

正統四年十二月二十二日

之 寶



漢復元勳後裔表

自古帝王之興曷嘗不建輔弼之臣所與共成天功者乎漢興自秦二世元年之秋楚陳之歲初以沛公總帥雄俊三年然後西滅秦立漢王之號五年東克項羽即皇帝位八載而天下乃平始論功而定封侯之大者不過萬家小者五六百戶封爵之誓曰使黃河如帶太山若厲國以永存爰及苗裔於是申以冊書之信重以白馬之盟又作十八侯位次高后二年復詔丞相陳平盡差列侯之功錄第下竟減諸宗廟副在有司始未嘗不欲固根本而枝葉稍落也故逮文景四五世間流民既歸戶口蕃息列侯大者至三四萬戶小國自倍如曹參初封萬六千戶至後嗣免時有二萬三千戶是為戶口蕃息富孳如之子孫驕逸亡其先祖之艱難多陷法禁隕命亡國故孝宣皇帝愍而錄之詔令有司求其子孫咸出庸保之中並受復除或加以金帛

用彰中興之德降及孝成復加卹問迹漢功臣亦皆割符世爵受山河之誓存以著其號亡以顯其魂賞亦不細矣百餘年間而襲封者盡或絕失姓或乏無主朽骨孤于墓苗裔流于道生為愍隸死為轉屍以往況今甚可悲傷聖朝憐閔詔求其後四方忻忻靡不歸心出入數年而不省察恐議者不思大義設言虛妄則厚德掩息遼東布章非所以視化勸後世三人為衆雖難盡繼宜從尤功于是成帝復絕蕭何良平之世增脩曹參周勃之屬得其宜矣以綴續前紀究其本末并序位次盡於孝文以昭元功之侯籍云

詔復元勳苗裔

復留侯良公六世孫千秋封陽陵公乘爵

漢高祖自云得天下由張良初以良為成信侯正月丙午封留萬戶侯十六年良薨謚文成侯子不疑嗣孝文五年坐與門大夫殺故楚內史贖城旦元康四年詔復良六世孫千秋封陽陵公乘復其家別有傳

復北平文侯倉後裔

秦時為柱下御史以客從漢王起武陽為常山守後相陳餘于代從正荼有功封北平文侯孝景帝六年薨康侯奉嗣元康四年坐臨諸侯免別有傳

復安丘懿侯張說後裔

為漢司馬繫項羽以將軍封定代侯二千戶孝文十三年薨共侯奴嗣十二年薨元康四年玄孫之子陽陵公造舜詔復家孝景三年赦侯執嗣一年薨四年康侯新嗣三十一年薨別有傳

復平嚴侯張瞻師後裔

漢王五年以趙騎將從繫諸侯封平嚴侯千五百戶八年薨孝惠帝五年康侯傳嗣三十七年薨元康四年六世孫勛上

傳連城詔復家孝景四年侯寄嗣元狩元年侯安國嗣別有

復宣平武侯張敖後裔

嗣父耳為趙王坐與曲貫高等謀反漢九年廢王為侯十七年薨呂后以魯元之故曲升侯懼為魯王孝文元年復為侯十五年薨謚共王六年哀侯歐嗣十七年薨高后八年四月丁酉侯侈以魯太后子封信都侯孝文元年以非正免孝景三年侯生嗣十四年有罪免元光二年侯廣孫以王弟紹封睢陵侯十八年薨元鼎二年侯昌嗣太初二年坐為太常之祠免去孫慶忌紹封千户元康四年封玄孫長陵公詔復家別有傳

復東陽武侯張相如後裔

高祖六年為中大夫以河間守擊豨力戰功十一年封東陽武侯十二年為孝文七年六年共侯殷嗣五年薨元康四年玄孫之子茂陵公乘宣詔復家後五年戴侯安國嗣孝景四年哀侯疆嗣

復富平敬侯張安世後裔

以右將軍光祿勳輔政勤勞侯以車騎將軍與大將軍光定策益封萬三千六百户彭祖以世父故掖庭令賀有舊恩封陽都侯千三月乙未侯建平元年侯純嗣王莽建國四年更為張卿侯

孝悌旌異表

唐時閭巷刺草之民以孝悌名通朝廷者皆書其名以旌表之故
史官贊曰聖人治天下有道要在孝悌而已父父也子子也兄兄
也弟弟也推而之國國而天下建一善而百行從其失則以法繩
之故曰孝者天下之大本法其末也至匹夫卑人行孝一槩而凶
盜不敢凌天子喟而旌之者以其教孝而求忠也古云求忠臣于
孝子之門此之謂歟今搜吾姓之孝悌昭著受旌榮者謹依唐書
表而著于譜用以彰已往而警將來也謹採列于左

張長

鄭縣

張萬徹

下邳

張元亮

朝邑

張立感

武邑

張藝朗

武邑

張利

南岳

張衡

南陽

張仙兒

南陽

張公憲

南陽

張金城

河東

張祐

河東

張師德

河東登
狀元第

張士岩

汴州

張進

巢縣

張讚

鄆陽

張常

句容

張球 弋陽

張萬和 相廬

張巨錢 郟武

張郭 奉先

張仁興 灋陽

張子英 湖城

張君密 曲沃

張阿九 京兆

張光玘 路州

張子英 絳縣

張抱 虞鄉

右皆數世同居者天子皆旌表門閭賜粟帛州縣存恤復賦稅有
 授以官者然委巷之陋非有學術禮義之資能忘身以及其親出
 于誠心亦足稱者廣明後方鎮凌法事不聞上孝悌篤行之士旌
 命所不及載小說者名字不參見他書不可錄若張志寬承上順
 下有禮讓君子之風故輯而序之士岩父病藥須鯉魚冬月冰合
 有獺銜魚至前得以供父父遂愈母病癱士岩吮血父亡廬墓有
 處狼依之進昭母患狐刺左手墮而終及殯進昭截左腕廬于墓公藝
 九世同居北齊東安王永樂隋大使梁子恭躬慰撫表其門高宗有事
 泰山臨幸其居問本末書忍字以對天子為流涕賜練帛而去

建武中為武始侯甘露三年繆侯啟嗣初元二年共侯臨嗣
卒思侯放嗣建武中復封六世孫純為武始侯純子奮嗣徙
居平原
別有傳

復鹵嚴侯張平後裔

以中尉前元年從單父起不入關以擊賊藉黥布盧縮之功
封鹵嚴侯二千七百戶高后五年侯勝嗣孝文四年有罪為
隸臣元康四年平玄孫長安公主常詔復家

列侯之裔有復爵者有復國者有復家者子孫世荷

君恩守遺慶奕世不失首封之地則可見本根深而慶

流長也或云彼皆貴戚之鄉非切于的派不足以為華

予曰不然秦漢之時宗室分遷者惟河內兗州杜陵河

間范陽襄陽洛陽數大派而已源流未遠也枝葉未繁

也據以疎密異之豈親又之謂乎且譜記世系留侯與

御史湯共祖魯王敖與北平侯倉同宗由是觀之豈有

彼此之議執書之于譜以示後之君子庶使知某因忠而榮某因詐而辱亦可為前車後轍之鑑云耳謹跋

唐宰相世系表

唐為國久傳世多而諸臣亦各修其家法務以門族相高其才子賢孫不殞其世德或父子相繼居相位或累數世而屢顯或終唐之世不絕嗚呼其亦盛矣然其所以盛衰者雖由功德薄厚亦在其子孫今列仕唐宰相十七人名于左別有傳

張文蔚

相哀帝

張行成

相太宗

張文瓘

相高宗

張嘉貞

相玄宗

張柬之

相武后

張仁愿

相中宗

張大安

相高宗

張九齡

相玄宗

張光輔

相代宗

張延賞

相德宗

張弘靖

相憲宗

張亮

相太宗

張錫

相武宗

張說

相睿宗

張鎬

相肅宗

張鎰

相德宗

張濬

相昭宗

宋彥祿公乞致仕奏狀表

臣彥祿自顧鎖微素無機畧自乾符之首天下沸騰匪野烽
燧萬姓失所臣祖父共集義衆固護鄉閭州縣知名即差充
饒州游奕使調護鄉民收居

京國累從

龍塞黃巢犯

關陵陷皇都蒙帖祖父隨

駕西行與賊交鋒身歿陣上叔父救護即命歿軍一家骨肉
半是傷亡蓋緣奉上無私所以不顧身首賊平後蒙降

詔封贈放免門徃父紹亦蒙優恤授以官資臣於天福年中蒙
江南招討使陶太師點差充德興利貢便奉

台命管押將士徃三衢討伐收復上饒又奉差遣防把白沙

首涉三年烽煙永息累受

皇恩還轉官秩一門之內沾受深恩實為過分今臣年已衰朽
大馬之力不任驅策願乞骸骨退居田里以盡餘年伏願
陛下察臣微忱從臣所請如賜允俞則臣雖死之日猶生之年伏
乞

聖恩特垂察納謹具奏狀奉

表以

聞

開寶甲戌八月

日

漢留侯良公遺像



畫象

畫

漢晉侯良公像贊

并引

公諱良字子房陳晉人貌秀而豔性智且勇時韓爲秦滅公以家世相韓奮復君父之讐與客刺秦王誤中副車秦求之甚急遂更姓名亡匿下邳因遇老父授以太公兵法後以其法說沛公誅秦滅項五載而成帝業迺封晉侯行實源委詳于傳

贊曰

聞張良之智勇以爲其貌魁梧竒偉及若婦人女子故孔子稱以貌取人失之子羽學者多疑於鬼神如良授書老父亦異矣高祖數離困阨良常有力豈可謂非天乎

漢史臣班孟堅贊

唐金吾志和公像



唐金吾志和公像贊

并引

公諱志和字子同號玄真子徽州祁門人祖貫金華母李氏
夢楓生腹上神人獻龜吞之而公誕焉故始名龜齡志和則
更名也擢唐開元吳瓚榜進士官左金吾大將軍廬母墓居
潤田後不復仕浪跡江湖自號煙波釣徒其行實文獻足證
譜紀可攷茲述其梗槩云

贊曰

其感而生也維龜維楓其出而仕也乃文乃戎其棄官也眇金紫
於秋蓬其浪跡也邈江漢之孤鴻遺像儼若肅肅雍雍煙波萬年
明月清風

宋翰林學士滕甫贊

宋教諭夢榮公像



宋祁教諭寧公像贊并引

為祁教諭寧公休環珠世家也諱寧字夢榮幼穎悟博通經史性行之懿而心為最仁家既富尤能施之鄉里此鄉里人罹凶歉之歲乃作粥賑活自不能坐視也已而主祁之教洩所學於模範之地士類陶成顯仕有為者居多焉故人以下良師目之

贊曰

宅心以仁富而能施故歲罹乎凶歉每作粥以賑饑問學飽蘊主教于祁陶成士類天下良師

長興府判官邑人姚鳴鳳贊

明壽官杞壽公像



明處士杞壽公像贊 并引

公諱杞壽字子南居休之環珠環珠距休二十里實為一鄉而鄉以杞壽公張氏顯公性仁勇於財積而能散貧有稱貸弗求其償嘗折券以甦之又紅巾寇至乃率衆保禦而寇不能侵擾黎民獲安豈非公之力也乎

贊曰

公之賦性有勇有仁財裕而散折券甦貧時為寇至實繼紅巾率衆捍禦保我黎民

懷慶府通判姻生項福慶贊

明慶士澹軒公像



明處士萬良公像贊并引

休環珠處士君名銓字萬良澹軒君之別號也貌魁偉心崇質正而矯亢而軟靡皆所弗屑君性尤孝且順自幼事祖以政公祖母孺人夏氏事父景真公母孺人汪氏咸竭力焉故鄉里爭羨之况制事以義極養用敬與物未嘗有忤色而名利弗累于心自適其適曾次悠然雖謂之葛天無懷之逸民

可也 贊曰

今人其貌古人其心不矯亢以銜俗匪軟靡而走塵順事乎祖性孝慕親以義為制動之權度以敬為養靜之主人名閔不蹈利窟罔侵徜徉乎白沙翠竹之場夷猶乎水雲山嶠之陰陶然與造物而俱盜罔知夫寥廓之為春噫若而翁者其葛天氏與無懷氏之逸民也耶

南京戶部主事江一桂贊

明方塘順之公像



三象

三圭

明處士方塘君像贊

并引

方塘君名天助字順之休環川之隱君子余觀夫人之生斯世也孰不有行惟常為難孰不有言惟實為難而君常之實之其亦超流輩矣且君性介無阿黨心虛寡嗜慾方塘實似之而君以方塘號人以方塘頌述斯名克稱情也夫誰曰弗宜

贊曰

行有常言有實厥性端方厥心湛一惟端方也持正而黨不阿惟湛一也守義而慾則窒偉哉斯人允宜來吾人之頌述

南畿解元鄭維成贊

西漢留侯良公傳

張良字子房其先韓人也大父開地相韓昭侯宣惠王襄哀王父平相釐王悼惠王悼惠王二十三年平卒卒二十歲秦滅韓良少未官事韓韓破良家僮三百人弟死不葬悉以家財求客刺秦王為韓報仇以五世相韓故良嘗學禮淮陽東見倉海君得力士操鐵椎重百二十斤秦皇帝東游至博浪沙中良與客狙擊秦皇帝誤中副車秦皇帝大怒大索天下求賊急甚良乃更姓名亡匿下邳良嘗閒從容步游下邳圯上有一老父衣褐至良所直墮其履圯下顧謂良曰孺子下取履良愕然欲毆之為其老乃彊忍下取履因跪進父以足受之笑去良殊大驚父去里所復還曰孺子可教矣後五日平明與我期此良因怪跪曰諾五日明良徃父已先在怒曰與老人期後何也去後五日蚤會五日雞鳴徃父又先在

復怒曰後何也去後五日復蚤來五日良夜半往有頃父亦來喜
曰當如是出一編書曰讀是則為王者師後十年與十三年孺子
見我濟北穀城下黃石即我也遂去不見旦日視其書乃太公兵
法良因異之常習誦居下邳為任俠項伯嘗殺人從良匿後十年
陳涉等起良亦聚少年百餘人景駒自立為楚假王在留良欲往
從之行道遇沛公沛公將數千人略地下邳遂屬焉沛公拜良為
廐將良數以太公兵法說沛公沛公喜常用其策凡沛人皆不省
良曰沛公殆天授故遂從不去沛公之薛見項梁共立楚懷王良
乃說項梁曰君已立楚後韓諸公子橫陽君成賢可立為王益樹
黨項梁使良求韓成立為韓王以良為韓司徒與韓王將千餘人
西畧韓地得數城秦輒復取之往來為游兵潁川沛公之徒雒陽
南出轅轅良引兵從沛公下韓十餘城擊楊熊軍沛公為令韓王

成留守陽翟與良俱南攻下宛西入武關沛公欲以二萬人擊秦
峽關下軍良曰秦兵尚彊未可輕臣聞其將屠者子賈豎易動以
刺願沛公且留壁使人先行爲五萬人具食益張旗幟諸山上爲
疑兵令鄴食其持重寶鳴秦將秦將果欲連和俱西襲咸陽沛公
欲聽之良曰此獨其將欲叛士卒恐不從不從必危不如因其解
擊之沛公迺引兵擊秦軍大破之逐北至藍田再戰秦兵僨敗遂
至咸陽秦王子嬰降沛公沛公入秦宮室帷帳狗馬重寶婦女以
千數意欲留居之樊噲諫公不聽良曰夫秦爲無道故沛公得至
此爲天下除殘去賊宜縞素爲資今始入秦即安其樂此所謂助
桀爲虐且忠言逆耳利於行毒藥苦口利於病願沛公聽樊噲言
沛公乃還軍霸上項羽至鴻門欲擊沛公項伯夜馳至沛公軍私
見良欲與俱去良曰臣爲韓王送沛公今事有急亡去不義迺具

語沛公沛公大驚曰為之柰何良曰沛公誠欲背項王邪沛公曰
鯁生說我距關毋內諸侯秦地可王也故聽之良曰沛公自度能
卻項王乎沛公默然曰今為柰何良因要項伯見沛公沛公與伯
飲為壽結媵今伯具言沛公不敢背項王所以距關者備它盜也
項羽後解語在羽傳漢元年沛公為漢主王巴蜀賜良金百鎰珠
二斗良具以獻項伯漢王亦因令良厚遺項伯使請漢中地項王
許之漢王之國良送至襄中遣良歸韓良因說漢王燒絕棧道良
示項羽無東意良歸至韓聞項羽以良從漢王故不遣韓王成之
國與俱東至彭城殺之時漢王還定三秦良乃上項羽書曰漢王
失職欲得關中如約即止不敢東又以齊反書遺羽曰齊與趙欲
并滅楚至項羽以故北擊齊良迺間行歸漢漢王以良為成信侯
從東擊楚至彭城漢王兵敗而還至下邑漢王下馬踞鞍而問曰

矣漢王曰何哉良曰臣請借前箸以籌之昔湯武伐桀紂封其後者度能制其死命也今陛下能制項籍死命乎其不可一矣武王入殷表商容閭式箕子門封比干墓今陛下能乎其不可二矣發鉅橋之粟散鹿臺之財以賜貧窮今陛下能乎其不可三矣殷事以畢偃革為軒倒載干戈示不復用今陛下能乎其不可四矣休馬華山之陽示無所為今陛下能乎其不可五矣息牛桃林之壑示天下不復輸積今陛下能乎其不可六矣且夫天下游士捐親戚棄墳墓去故舊從陛下者但日夜望咫尺之地今乃立六國後誰無復立者游士各歸事其主從親戚反故舊陛下誰與取天下乎其不可七矣且楚唯毋彊六國復橈而從之陛下焉得而臣之其不可八矣誠用此謀陛下事去矣漢王輟食吐哺罵曰豎儒幾敗迺公事令趣銷印後韓信破齊欲自立為齊王漢王怒良說漢

王漢王使良授齊王信印語在信傳五年冬漢王追楚至陽夏南
戰不利堅壁固陵諸侯期不至良說漢王漢王用其計諸侯皆至
語在高紀漢六年封功臣良未嘗有戰鬪功高帝曰運籌策帷幄
中決勝千里外子房功也自擇齊三萬戶良曰始臣起下邳與上
會留此天以臣授陛下陛下用臣計幸而時中臣願封留足矣不
敢當三萬戶迺封良為留侯與蕭何等俱封上已封大功臣二十
餘人其餘日夜爭功不決未得行封上居雒陽南宮從複道望見
諸將徃徃數人偶語沙中上曰此何語良曰陛下不知乎此謀反
耳上曰天下屬安定何故而反良曰陛下起布衣與此屬取天下
今陛下已為天子而所封皆蕭曹故人所親愛而所誅者皆平生
仇怨令軍吏計功天下不足以徧封此屬畏陛下不能盡封又恐
見疑過失及誅故相聚謀反耳上乃憂曰為將柰何良曰上平生

所憎群臣所共知誰最甚者上曰雍齒與我有故怨數窘辱我我欲殺之爲功多不忍良曰今急先封雍齒以示群臣群臣見雍齒先封則人人自堅矣於是上置酒封雍齒爲什方侯而急趣丞相趣御史定功行封群臣罷酒皆喜曰雍齒且侯我屬無患矣劉敬說上都關中上疑之左右大臣皆山東人皆勸上都雒陽雒陽東有成皋西有殽黽背河鄉洛其固亦足恃良曰雒陽雖有此固其中小不過數百里田地薄四面受敵此非用武之國夫關中左殽函右隴蜀沃野千里南有巴蜀之饒北有胡苑之利阻三面而固守獨以一面東制諸侯諸侯安定河渭漕輓天下西給京師諸侯有變順而下足以委輸此所謂金城千里天府之國劉敬說是也於是上即日駕西幸都關中良從入關性多疾卽導引不食穀閉門不出歲餘上欲廢太子立戚夫人子趙王如意大臣多爭未決

呂后恐不知所爲或謂呂后曰留侯善畫計上信用之呂后乃使
建成侯呂澤劫良曰君常爲上謀臣今上日欲易太子君安得高
枕而卧良曰始上數在急困之中幸用臣策今天下安定以愛欲
易太子骨肉之間雖臣等百人何益呂澤彊要曰爲我畫計良曰
此難以口舌爭也顧上有所不能致者四人四人老矣皆以上嫚
媢士故逃匿山中義不爲漢臣然上高此四人今公誠能毋愛金
玉幣帛令太子爲書卑辭安車因使辯士固請宜來來以爲客時
從入朝令上見之則一助也於是呂后令呂澤奉太子書卑辭厚
禮迎此四人四人至客建成侯所漢十一年黥布反上疾欲使太
子徃擊之四人相謂曰凡來者皆以存太子太子將兵事危矣乃
說建成侯曰太子將兵有功臣即位不益無功則從此受禍且太
子所與俱諸將皆與上定天下梟將也今迺使太子將之此無異

使羊將狼皆不肯為用其無功必矣臣聞母愛者子抱今戚夫人
日夜侍御趙王常居前上終不使不肖子居愛子上明其伐太
子位必矣君何不急請呂后承間為上泣言黥布天下猛將善用
兵今諸將皆陛下故等夷迺令太子將此屬莫肯為用且布聞之
鼓行而西耳上雖疾彊載輜車卧而護之諸將不敢不盡力上雖
苦彊為妻子計於是呂澤夜見呂后呂后承間為上泣而言如四
人意上曰吾惟之豎子固不足遣迺公自行耳於是上自將而東
群臣居守皆送至霸上良疾彊起至曲郵見上曰臣宜從疾甚楚
人剽疾願上甚毋與楚爭鋒因說上令太子為將軍監關中兵上
謂子房雖疾彊卧傳太子是時叔孫通已為太傅良行少傅事漢
十二年上從破布歸疾益甚愈欲易太子良諫不聽因疾不視事
叔孫太傅稱說引古以死爭太子上陽許之猶欲易之及宴置酒

太子侍四人者從太子年皆八十有餘鬚眉皓白衣冠甚偉上怪
問曰何爲者四人前對各言其姓名上迺驚曰吾求公迺我今公
何自從吾兒游乎四人曰陛下輕士嫚罵臣等義不辱故恐而亡
匿今聞太子仁孝恭敬愛士天下莫不延頸願爲太子死者故臣
等來上曰煩公幸卒調護太子四人為壽回畢趨去上目送之召
戚夫人指視曰我欲易之彼四人為之輔羽翼已成難動矣呂氏
貢迺主爾戚夫人涕泣上曰爲我楚舞吾爲若楚歌歌曰鴻鵠高
飛一舉千里羽翼已就橫絕四海橫飛四海又可柰何雖有矰繳
尚安所施歌數闋戚夫人歔歔流涕上去罷酒竟不易太子者
良從持此四人之力也良從上擊代出奇計下馬邑及立蕭相國
所與從容言天下事甚衆非天下所以存亡故不著良迺稱曰家
世相韓及韓滅不愛萬金之資爲韓報仇夷彊秦天下震動今以

三寸舌為帝者師封萬戶位列侯此布衣之極于良足矣願棄人間事欲從赤松子游耳迺學道欲輕舉高帝崩呂后德良迺彊食之曰人生世間如白駒之過隙何自苦如此良不得彊聽食後六歲薨謚曰文成侯良始所見下邳圯上老父與書者後十三歲從高帝過濟北果得穀城山下黃石取而寶祠之及良死并葬黃石每上冢伏臘祠黃石子不疑嗣侯孝文三年坐不敬國除

唐康國公嗣宗傳

張後胤字嗣宗蘇州崑山人漢蜀郡太守睦十六世孫高祖禕晉瑯邪王郎中令曾祖顯齊廬江太守祖僧紹零陵太守父仲陳國子博士入隋爲漢王諒并州博士後胤弱冠以孝行稱其家高祖鎮太原引爲客以經授秦王義寧初爲齊王文學封新野縣公武德中擢員外散騎侍郎賜宅一區太宗即位進燕王諮議從王入朝召見初帝在太原常問隋運將終得天下者何姓荅曰公家德業天下繫心若順天而動自河以北指撫可定然後長驅闕右帝業可成至是自陳所言帝曰是事未始忘之乃賜燕月池帝從容曰今日弟子何如後胤曰昔孔子門人三千達者無子男之位臣翼資一人乃王天下計臣之功過于先聖帝爲之笑令群臣以春秋酬難帝曰朕昔受大誼于君今尚記之後胤頓首謝曰陛下乃

生知臣叨天功爲已力罪也帝大悅遷燕王府司馬出爲睦州刺史乞骸骨帝見其疆力問欲何官因陳謝不敢帝曰朕從卿授經卿從朕求官何所疑後輒頓首願得國子祭酒授之遷散騎常侍求徽中致仕加金紫光祿大夫朝朔望祿賜防閣如舊卒年八十三贈禮部尚書謚曰康陪葬昭陵子九人震富陽縣公濟睦州刺史謙散騎常侍巽散騎常侍律師王府叅軍少師耒陽令彥師駕部郎中統師金部郎中道師舒州刺史孫旭玗玘繼本義方承休瑾豐仁弼曾孫齊丘歷監察御史朔方節度使終東京留守謚曰貞獻子鑑別有傳

唐御史弘公傳

張弘諱弘道字公權刺史濟公長子也麟德中舉進士第歷御史大夫與薛元超斐炎同治章懷太子獄無所同異表去位出判江右饒州承隋亂之後產荒俗弊民廬凋謝百廢不舉公至以正學校勸農業爲先務民樂風化時復水旱相仍歲大飢疫並熾民不堪命公恐饑迫盜起乃微服按行以義勸諭死者幾半境内索然公捐俸夫人解簪珥易米爲粥濟活者甚衆就食之民日益夥矣公憂之曰不能保赤子何以爲民父母乎乃以實聞乞賑不待命先發倉廩散積輸求濟於鄰封民有賴焉時復催科困迫公曰疲癯之民父子離散救死且不暇復何預焉誠所謂受人牛羊而無菟牧忍視其死而不反乎乃謂其民曰朝無恤民之典官無撫字之能吾將去之夫人王氏終於任百姓感公之愛請安厝於新平

之倉塢負土塋者如蟻後號其塚爲蟻封公掛冠於饒州宦遊於
歙之赤山鎮鎮廵士汪德釗以女妻之玘因留家焉營居第於鎮
傍唐永泰丙午改鎮爲縣易基地爲縣治公生貞觀丁酉卒開元
戊午偕夫人汪氏塋鎮南闔山之麓三子長潤朝復居饒之新昌
依母墓也次深朝三游朝游朝幼穎異擢進士第知揚州事陞監
察御史出守會稽復居金華號休齋考終追贈尚書娶京兆魏八
柱國弼公六世孫鄴侯李泌姐贈秦國夫人孫三長曰霞齡次曰
鶴齡三曰龜齡龜齡即金吾志和也奉勅塋母李夫人於祁西潤
田因廬墓子孫遂家焉

明旌表節婦陸氏傳

節婦陸氏南京衛宦族陸善亨公女也年及笄適故族子旌邑許衝張友深次年生子頊又明年友深捐舍頊纔男孩笑所親多以人生朝露韶華難得之言說之欲其變所守陸氏屹不為動徐曰馬受二鞍良馬乎况姑在堂孰與事之禽獸之行吾不為也衆不敢復言儉勤備至操守益堅撫頊長成卒為敦朴士有司禮致于鄉飲居三篇之列亦可見節婦之有後矣弘治間有司以事聞詔表其門以旌其節云

鄉進士旌德教諭吉水曾漢撰

明節婦吳氏傳

節婦吳氏初門人奭公妻也年二十五夫歿守志不二年七十三不病而逝

明節婦陳氏傳

節婦名白音祁門陳義公女也塘頭克昂公之妻年十八歸張氏一月夫歿甘心事姑不違禮母命歸家逼嫁婦曰生陳死張焉肯更履他人之門自縊而亡合邑人傷感其烈

明節婦凌氏傳

節婦名賽音歙邑南鄉白石嶺凌資公女年二十五歲夫璟為解錢糧在京而亡撫養幼子哭泣不絕父母遂嫁之咬指為誓紡績織紵享年八十二歲而歿

明節婦王氏傳

節婦名海英歙邑南鄉蔡塢王積德公女年二十七夫永禧病故孀居子幼高門求媒灼而配者欲奪其志端坐不起終身守志誓不更二家貧紡績織紵壽年八十二歲至老不倦

烈女張氏傳

烈女龔自立妻樂昌人嘉定中寇夫妻襁負二稚竄匿為賊所得脅以行張與夫訣曰妾死無憾所憐者二子幸善撫之中道詎賊曰吾渴欲就飲可暫解我縛賊從之遂竄江中邑人為立祀以旌烈女張氏傳

烈女許伯仁妻婺源人年二十一適伯仁未幾而卒事姑甚謹明年姑卒遺腹生一子亦卒夫族據其業毀其家婦無所居歸母家鬻簪珥買田別築一室奉許氏祀婺居二十三年而歿聞者憐之烈女張氏傳

烈女吳子忝妻歙縣人年二十八夫亡孀居事舅姑以孝聞撫孤有成壽七十八朝廷旌表其門

烈女張氏傳

烈女秦溶公女名玉仙祁門人許邑西竹源陳氏年十八未婚而
婿故守節不適人父母欲嫁之女斷指為誓紡績織紉至老不倦
堅守一室雖至親不得見崔按察為之立節女坊

烈女張氏傳

烈女賀敏尋妻元洛州人年二十四病篤謂張曰我若不諱與年
少無嗣可更適人張泣以死自誓敏尋卒張即自縊遂同穴葬焉

烈女張氏傳

烈女王賜成妻婺源在城人伯壽公女年二十夫故立從子昭暉
為嗣居孀不二八十餘而歿

烈女張氏傳

烈女婺源游汀人自少貞潔知書年十六嫁清華胡氏未幾夫亡
人強娶之不從嚙指血寫詩于羅裙上竟刎而死

明節婦程氏傳

節婦姓程名昔為休陽汶川程君利次女也幼有淑質父母鍾愛之長為擇配得同邑漁灘張君良佩以妻焉自歸張氏而良佩之考君已捐世姑吳氏孀居在室節婦事之備全孝養其姑罔不悅懌甫七年而良佩繼逝程氏痛絕幾死者屢矣然念二孤孑然長茲年四歲次錡年三歲乃勉為自存誓不他適有勸之易節者輒罵曰吾本名家女今為名門婦肯失身以辱二姓乎自是益加砥礪深居寡出四時畜鷄豚務紡績以佐費二子使之從學皆近有成矣姑歿痛悼尤至殯祭以禮鄉隣靡不賢之其子鎡德母氏之聖善乃徵予傳其行以垂不朽嗟乎節義人之大閑也然能履之者為難以理不能制欲爾一有能全其理烏得不為傳播以為世道人心之勸也故栢舟之詩聖人采之以附聖經之中而曹氏實

女之節文公亦載之小學是豈徒爲照映古今增輝典籍亦將使
誦而聞之者有以興起其秉彝之良心其爲世道計深矣今程氏
又得於家門之漸染如其姑吳孺人同一不二之心然以二節而
創見於張氏之一門則張氏家世之善風聲氣習之美其有以夏
出於他族之上亦足於此徵矣是宜傳之不失將使觀民風者采
之以紀于史氏以昭于簡冊殆與前人之休光同一流播且以媿
夫世之悖理亂常之徒雖快一時之欲而卒與蝼蟻草木同臭腐
者視節婦之行寧不霄壤異哉則在程氏一身所繫雖細然爲世
勸則大矣乃不辭書之以爲傳

嘉靖癸巳夏四月朔

賜進士出身中順大夫知饒州府事前

北京戶部郎中致仕婺源葉天爵撰

謙齋傳

謙齋君名宗和字節之別號謙齋環川張氏休之名家君為名家子性謙和犯不校居鄉黨慈如也生三年失母越二十二年失父君德夙成事母恭慎母有前息意堅異爨蓋為私橐計而姑順之坐租為養後二年母租歸女用弗足君請爨侍外願給租養志母感就故人以孝稱焉嘗商外借行者女兄夫也君歸以所挈資託之迨十載還前資弗償無愠色族人求易其地術者以堪壙乃為君謀君曰利人猶我易之哉築室便學公已所有而先子以金貸暨君咸置慨世之臨財忘義語妻曰人恒不自知若有汝當切戒亦古之喜聞過也君平心率物人樂親之固有爭訟不願聞官願決于君之片言田遭洪水潰者甚廣謀衆錢穀簿數之逸者與人而躬勞督課乃底厥績塾久燼荒君首成之觀者曰澤及後進

皆謙齋君力也譜學廢講心尤激切相率會修于祁之源族卜先子葬地地隣祖塋人曰可遠君曰諾人曰可再遠君亦無難色及破土得穴若先設識者謂天相之也其立心制行類如此而世豈多得哉故為之傳以示勸

論曰性本善也故動則直夫惟氣拘物蔽始以惡變矣而君孜孜為善惟日不足順事其母崇孝也弗急其利崇義也敦本重祖崇敬也凡動也皆可稱述焉者也而仰不愧俯不忤君非天地克肖子乎

嘉靖丙申歲仲夏之吉

賜進士出身戶科給事中祁邑場山蔣貫撰

張氏統宗廟墓卷之九

按孔子曰爲之宗廟以鬼享之卜其宅兆而安厝之此可見廟墓之制其來遠矣吾宗歷代以降前人廟墓有載在祀典郡縣血食者有福祚彊里歲時香火者有卒塋本土子孫祀守者不限遠近不拘今古考據所在明志譜牒俾後之人使識某廟某處某墓某處不惟採狐歿晉丘之說其或陵谷之遷變則同宗之子姓亦各易於管攝而不至爲樵採之場也已

黃帝廟

一在河南宜陽縣西一在鄆德府濬陽縣宋大中祥符初賜名先天觀一在陝西慶陽府合水縣東子午山統志載祀典子午山又名橋山旁有黃帝陵昔漢武帝北巡朔方還祭黃帝于橋山帝曰吾聞黃帝不死有塚何也對曰帝騎龍上天群臣葬其衣冠於此

宣濟廟

一在山西太原府汾州一在山西平陽府翠金山揮公之子昧公為玄冥師司五行水正之我昧公子臺駘能業其官帝嘉之封諸汾川唐建初中石晉封昌寧公宋加額曰宣濟

漢留侯廟

一在河南開封府陳留縣西南一在徐州沛縣東南二高祖定天下以功封留侯惠帝六年壬子秋薨謚曰文成侯勅封廟祀唐太宗詔配孔子廟庭咸亨間出饗太公廟載在祀典

漢廷尉廟

在河南南陽府裕州城西石塌尚在祀釋之公

漢漢陽太守廟

在北直隸順天府薊州西北隅漢漢陽太守堪公勸農桑以致富饒百姓立廟祀而歌曰桑無附枝麥秀兩岐張君為政樂不可支

唐康國公祠

在直隸蘇州府崑山縣北唐張嗣宗為國子祭酒求
徽中致仕後三年卒謚曰康國公太宗從授經遣使

弟祭因立祠於邑北故宅

唐東之公祠

在四川重慶府合州治西公任合州刺史故事以兵
五百戍姚州地險到屯輒死公論其弊民間立祠祀

之

唐仁愿公祠

在山西大同府懷仁縣公築受降城後人思之為立
祠祀焉

唐文獻公祠

在廣東韶州府南祀唐相張九齡玄宗幸蜀遣使弟
祭因立祠於州東故第鑄鉄像祀焉宋天禧間徙入

城有曾三省祀郭祥正詩當年致主陳金鏡後世空祠
見鉄胎元班世傑詩詔陽城郭白雲關賢相祠堂杏靄間

階下莓苔春未老庭前松栢鶴空還千秋獨悟呈金鑑十
載先知恨祿山黃閣勛名昭汗簡曲江流水日潺湲載在

祀典

唐鑑公祠

在直隸鳳陽府濠州之東唐相張鑑大歷初為濠州刺
史政條清簡延經術士講授生徒天下牧守課績鑑理

行第一後人立祠焉

唐別駕弘公祠

在江州城西至府城北唐張弘道由御史大夫出判

歲大饑災疫並熾民不堪命公恐飢迫盜起於是捐俸夫
人辭簪珥易米為粥濟活者甚衆就食之民日益夥矣公
憂之乃以實聞乞賑不待命先發倉廩散積輸求借於隣
封民有賴焉立祠祀之

唐張將軍祠

在直隸徽州府祁門縣西茶園弯一在西北一都之

張村一在徽州府祁門縣西茶園弯一在西北一都之
人范梈進士授翰林待詔以扈畢功加左金吾大將軍時即
民且懼且即舊有差仍加布貨之徵公奏除知民受其
惠鄉人思之立祠祀焉宋丞相張商英公重建祠宇
變謁神廟至祠見公石刻命縣尹鄭亨公重建祠宇

唐嘉貞公祠

在陝西漢中府梁州之左唐張嘉貞為梁州都督政

後轉中書令軍民立去思祠祀焉

唐清流祠

在直隸徽州府祁門縣北福廣鄉張坑口接官亭一在

孫英廷英才乾符間黃巢犯闕生民塗炭英廷共集義旅
保護鄉閭英廷與賊交鋒歿於陣英才負屍歸葬帝憫其
忠義詔封英才中書舍人英廷清流將軍授其子紹與化
縣丞鄉人立祠祀焉

黃帝陵

在山東兗州府曲阜縣東北二里黃帝軒轅氏葬衣冠於此本名壽丘

魏相儀公墓

在河南開封府城北七里

北平侯蒼公墓

在保定府滿城縣西

漢留侯良公墓

在陝西西安府咸陽縣西北三十里

漢趙王耳公墓

在河南開封府祥符縣母寺保其側有廟

漢富平侯安世公墓

在陝西西安府城南八里

漢安鄉侯禹公墓

山東兗州府鄒縣西三十里

漢太守綱公墓

在四川眉州岷嶷山東漢張綱討廣陵賊張嬰有恩信士卒嬰率五百餘人制服送至墳聊復葬衣冠於此

漢魯王敖公墓

在湖廣襄陽府房縣西一百里

漢尚書衡公墓

在河南南陽府界東北石橋保有崔瑗為作墓碑

吳太傅溫公墓

在南直隸滁州城西門外

晉司空華公墓 在順天府東南六十里迥城之東

晉郎中令禘公墓 在蘇州府二十里橫山

南宋尚書裕公墓 在蘇州府西南十五里獅子山

唐康公嗣宗公墓 在陝西西安府醴泉縣九峻山唐太宗昭陵陪葬諸臣唐儉姜晦李大亮張嗣宗等凡五十三人俱以丞郎三品陪葬於此

唐始興縣伯九齡公墓 在廣東韶州府城北二十里臨武源

唐睦州刺史濟公墓 在浙江金華府白鹿山

唐別駕珣公墓 在直隸徽州府祁門縣南閭山之右良龍丁向今都製錦鄉安福里係經理一畝土名牛欄塢叔

字二百五十八號墓山五畝地一畝一角東溪西南北降在城張祐鄉名目僉業祁邑張氏世業其祀宋丞相忠定公邑人汪伯彥重撰墓表

唐尚書游朝公墓 在浙江金華府東十里地名蓮塘長子霞齡奉祀君之後裔有題云牧童辭指看碑路野袖分

畊祭墓田

金吾志和玄真子先生行狀

先生還造化越十一載子衢奉先生遺書若干卷遠來淮南丐予
狀其行且知予與先生講夙好于會稽其風致高邁若孤鶴意思
從容類閒鷗人莫能致予嘗慨先生之不返而無有能拓予之聞
見者適子衢所請不亦神契先生精爽于今日而增予景慕之私
於無窮邪先生姓張氏祖貫浙之金華人漢留侯二十七世孫大
父侍御弘出判饒州棄官隱居歙州赤山鎮父游朝贈官尚書母
李氏夢腹生楓遂娠及誕有靈龜之瑞因名龜齡狀貌魁竒掌有
天光二文性甚警敏年十六以明經遊太學登吳瓚榜進士第帝
令待詔翰林獻策南宮尋以扈蹕功授金吾將軍更名志和字子
同丁內艱奉勅葬妣夫人李氏於赤山鎮西五里之潤田親負土
石崇壙仍餘時有黃鷄突入壙內司晨三年人以為孝感所致環

壙植楓栢鬱然成林結廬于墓側朝夕拜哭寢苦枕塊孝思極至
服闋朝廷屢詔不起隱居黥之黃山復遊吳楚山泛舟於江湖挹
清風載明月自號烟波釣徒垂釣不設餌志不在魚也晚年窮理
盡性眇觀萬物著書十餘萬言更號玄真子肅宗嘗賜奴婢各一
人先生配爲偶名曰漁僮樵青人問其故荅曰漁僮使捧釣收綸
蘆中鼓柁樵青使蘇蘭薪桂竹裏煎茶兄浦陽尉鶴齡恐其浪迹
弗還乃爲先生卜地于會稽東郭構茆堂以迎居予時爲浙東觀
察使甚禮重之因表其居曰玄真坊即先生之自號也先生賦性
質直弗親踈於人故人亦不能窺其喜愠坦然曠然肆志物外爲
文章變態流麗若爛錦輝壁見者奪目大曆九年秋訪顏真卿于
湖州真卿見其舟敝請爲更之謝曰儻惠漁舟願以爲浮家泛宅
沿汴江湖往來茗雪之間即野夫之幸矣陸羽嘗問先生有何人

往來答曰太虛爲室明月爲燭與四海諸公未嘗離別何有往來
子衢踪跡先生于湖州而先生已長往棄人間事不可得而追及
矣遂具衣冠葬于會稽之東郭依先生之舊隱志不忘也收先生
所著玄真子集十二卷大易十五卷滄浪漁父詞以歸先生兄弟
三人孟霞齡仲鶴齡季即先生開元二年正月一日生配程氏李
氏三子衡秘書郎衛承直郎衢承事郎孫十人學箕學紳學翰學
裘學明學經學諭學詩學禮學行嗚呼達人逸士世不多見其能
以草芥功名養高一世而託迹於煙波雲水之鄉如先生者可謂
睥睨天地出入冥化者矣顧予辱以見知之厚而先生之潛德當
聞死生契濶每切于懷有不俟子衢之請而後書也豪傑之士自
能采擇銘之玄室求求無斁

皆

建中五年 月 日淮南節度使同平章事陳少游

撰

明處士德輝公墓誌銘

公諱玘生字德輝姓張氏世居休邑之環川自曾大父以上代有
隱德父諱仕直慤而文有古人風公承父志居家平心率物而矯
飾弗事焉且文雅外觀素爲世之所推重蓋嘗肆力於孝矣諸子
百家靡不涇貫旣而嘆曰學以明吾理而已奚顧其他乃自止居
常正襟危坐不苟言笑及賓友時至揚確古今品第人物則議論
英發出人意表凡鄉里中事有難決者皆委以決之某爲是某爲
非判正之後人無異言人或干以私公必正色辭之終不怵於勢
而有所回護也於是世之人益嘉重焉公臨終囑其子曰吾生平
無過治喪不用浮屠爾宜繼吾志可也言畢遂逝公性至孝事府
君及安人汪氏甚謹禮伯仲二人公爲次也怡然可追上代公
藝之風享年五十有九以嘉靖癸未年九月十二日卒其生於成

化乙酉年十一月二十六日葬以卒之年十二月初十日墓曰閔
坑之原初配胡氏已歿同葬其處後配游氏亦皆貞一端莊可稱
者矣男宗和卓有成立娶同邑曹氏女一適資村汪珪孫女二在
室未聘葬且若干年墓右之銘尚闕且公之子於予甚厚屬予銘
以傳不朽義不敢以不文辭於是僭銘銘曰

富貴如其材公何歉也福壽如其德公何嗇也公之所能者天也
公之所不能者人也天乎人也何尤

嘉靖丁亥孟秋吉旦白嶽初仙方豪書

歸來辭

鶴齡

嗚呼噫嘻吾子何之胡不歸來乎使我傷悲爾幼也排青雲而叫閭闔爾壯也扶日月而拜亨衢收功定業衣錦榮歸廬親墓而遂平生之志愿拜恩誥而增蓬壤之光輝柰何懼

君命之逼迫遽爾棄妻子而逃移使手足之莫續痛骨肉之支離棄鵲鷓之急難慮鴻鴈之孤飛嗚呼噫嘻胡不歸來乎別恨無窮厭假途於黃石愛追遊於赤松駕輕舟而浪蕩垂長釣而飄蓬嗚呼噫嘻胡不歸來乎使我悲傷惜棠棣之無華忍荆樹之凋浪名萬世而不朽書千金而誰將吊祭不至今在何方想爾度量如湖海之寬想爾精英如日

月之光感蘭桂之哀慕
依椿萱於廟堂

玄真子漁歌記

德裕頃在內庭伏覩

憲宗皇帝寫真求訪玄真子數不能致余世與玄真子有舊早聞其名又感

明主賞異愛其才見思每夢想遺跡今乃獲其所作漁歌如遇良賓於戲漁父賢而名隱鷗夷智而勲高著夫玄真隱而其益彰顯而無事不窮不達其巖光之比與處二子之間誠有裕矣

長慶二年壬寅歲夏四月辛未日

潤州刺史兼御史大夫李德裕記

西塞山前白鷺飛桃花流水鱖魚肥青箬笠綠蓑衣斜風細雨不須歸

釣臺漁父葛爲裘兩兩三三作艫舟能縱棹慣乘流長江白浪

不曾憂

雪溪溪裏釣魚翁
舴艋爲家西復東
江上雪浦邊風反著
蓑衣不歎窮

淞江蟹舍主人歡
菰飯尊羹亦共餐
楓葉落荻花乾
醉泊漁舟不當寒


青草湖中月正圓
巴陵漁父歌還釣
車子掘頭船樂在風波
不用仙

東山別意序

尼防龜蒙皆予封內東山而名東山者未有世或指以為蒙也泰山舊亦在予封內下視諸山大躡豕伏無可與並上有丈人峯高接層霄古之以嶽稱婦翁者蓋取諸此今為一省鎮孟軻氏曰孔子登東山而小魯登泰山而小天下世遂以泰山誌山東而以東山言吾國有事於斯君子不欲曰魯故以東山云也戊辰之秋兩霽風涼几案頗清時坐便殿瑒有胡廷琚持卷進而啓曰客有張氏子以廼嶽翁鮑地官病歸來自休寧問安茲將南還地官為繪圖賦詩以贈宗室暨國中士大夫皆有賦者題曰東山別意臣輯成卷願乞睿翰以冠諸首予聞新安之俗君子好為高行竒節而尤耻為不義若人者得非高行而好義者乎夫人之立身莫大乎仁與義也仁莫先於親親而義莫先於敬長苟於是而致力焉

人之道盡矣未有仁而不愛其親敬長而不義也今張氏子為鮑氏婿是地官者親則父之分尊則長之行也休寧去宛殆三千餘里河江之阻山川之險非剡溪之棹花外之輪可夕至而朝返茲歷跋涉冒辛苦而來不於榮仕之時而於其閒居之日問安之外無他謀焉是知親之當愛長之當敬好仁克致夫力之篤趨義不畏夫途之難是非高行好義者歟世固有依閨房之親怙勢籍寵取榮利于一時者張氏子果為是而東哉此其人可重而別足惜也此東山別意圖詩宜我宗室所樂賦而縉紳所喜詠地官以之為贈也視其卷篇連牘累有鄭六卿送韓宣子之意數則過之張氏子拜受而歸是可知所重而篤燕好之情哉張實漢留侯之裔所持譜系甚詳代有聞人今為休寧右族義清存仁其名字也號立齋是曰仁與義講之熟而見之真必其家庭之內事親從兄

懽然燦然有足觀者可謂能顧名思義庶幾乎夙興夜寐無忝於
所生矣予因廷琚之請遂為序以賜豈直為存仁美觀亦以重地
官意而深嘉吾黨能與人之善云正德戊辰歲秋七月穀旦書于
尊德堂



環珠管建書樓序

休邑張氏之居于環珠者土因以著傳世既久族益蕃大禮教是
飭可誇也茲協擇地作讀書樓以訓養群子弟族弟止當發蒙之
任嘉其事乃颺言於予曰美哉諸君之志也善哉惠迪之謀也允
哉厥地之臧也川原盱其駭屬高爽豁其習襟白嶽背負雲宮仙
跡為江南雄勝靈秀所鍾哉清池面臨天光倒浸魚躍鳶飛道躡
昭哉平接沃壤耕耘以時苗秀而實生意克哉大河南帶祖墓北
峙水木本源之在眼將使學者之取資於是樓也亦已多矣張氏
諸君子之於是舉誠可尚已予聆賞之曰都業之勝者人耳譽擅
之高者志耳昔李公作讀書樓實代訓義方其人其事抵今可慕
世有若考作室子肯弗堂者矧肯構有愛而勿勞逸居而無教者
矧肯穀張氏之為子弟慮者可謂審也已矣可謂至也已矣夫人

生而蒙不學則愚工不居肆則業不精聖人畫上艮下坎之卦名
之曰蒙有深意也艮止為山坎險為水山下出泉靜清可養而養
必于在山之時故曰蒙以養正聖功也奚養也曰君子以果行育
德九二曰包蒙吉子克家六四曰困蒙吝解之者曰能求剛明之
德而親近之則吝可免矣古人樂有賢父兄者此也張氏諸父兄
其賢矣哉使仰名山而不虧其功臨清流而見此理之著觀田苗
而知握長之失水流有本壩墓知欽其責有所歸者在於明者之
養蒙與蒙者之自養又皆利於以正也若然斯不負斯樓之都勝
也斯不負作者之意也此予之所以至為游焉息焉者告也作之
為誰曰宗和曰松者皆好義之士云

嘉靖己丑孟冬月上澣之吉鄉進士郡人江棧撰

靜齋序

天下之道常失於動者由失靜之所養也蓋靜爲動之根靜不養而能謹於動者寡矣故大學曰安曰慮曰得必本於靜定中庸戒懼不覩不聞與孟子夜氣之喻雖所指淺深不同而其義皆不外發明靜養之力漢唐諸儒少窺及此惟諸葛武侯有謂非寧靜無以致遠曰夫學須靜非靜無以成學又曰險躁則不能理性此武侯平生許大光明事業要之未始無所本及宋儒周子建菑之說乃有主靜之義二程宗之因每語人以靜坐又曰萬物靜觀皆自得繼二程之意者延平則令學者休驗喜怒哀樂未發時氣象是皆於靜之力有見焉自後世學失師傳人惟知致力於口語文詞之末身心之功固不暇及是宜用世者率隨其氣質所受躁者終不能使之安詳險者終不能使之易直故有以學自命而所行所

守曾不免見唾於庸人其在齊民之中乃有篤志力行足爲君子所與此固生質之美然即其所至亦未始無其本也若休陽張君存德以靜名齋斯可以觀德矣靜固致德之本然必有德者然後乃能靜予自少年蓋嘗踵君之門接君之談知爲靜定人也然自奔走仕途不得與君相往還者二十年于茲今得退處丘園乃知君子所養益深所行益篤年彌高而德彌邵信乎得於靜之功也彼服儒衣戴儒冠口談忠信而行曾齊民之不若者視君之去就何如耶君兄立齋於予爲最契今不可復作矣而君居然物享眉壽不可謂歲寒松柏乎茲以名齋之義未有爲序之者而徵言於予予烏得以不敏辭遂書之

嘉靖癸巳夏四月朔文林郎朋峯雪泉子江涯書

謙齋序

環川張子宗和氏齋名謙朱子汝植來徵序程子曰謙美德也而有安與勉與矯之不同安則堯勉則顏矯則鄉愿堯讓堯謙也不伐顏謙也謹厚鄉愿謙也似也而實非也君子惟其是而已去其矯就其勉之而已則安夫是之謂能謙也謙之時義大矣哉是故天道能降謙也天以降而光明地道能卑謙也地以卑而上行鬼神之道藏諸用謙也乃有以藏用而化生月以虧而盈谷以虛而應水以坎而容謙之時義大矣哉是故聖人畫卦地在山上名之曰謙山高也地卑也以卑蘊高謙斯名焉內卦為艮外卦為坤艮止也坤順也內止外順謙斯善焉有大者必不能謙序謙於大有之後意斯到焉聖人之貴謙如此謙之時義大矣哉張子之謙吾知其安則不能矯則不敢惟勉於顏庶幾乎初六之君子也謙

之初六曰謙：君子利涉大川。張子無欲上人，謙卑自下，猶夫初也不欲前驅，却然退遜，猶夫六也。勉初六之謙，則止於良而退夫。坤之順亦猶山之高而下於地之卑也。張子其志謙哉！持謙以往，則雖有而不盈，雖能而不矜，守天下之谷而應天下之敵，為天下谿而天下莫與爭勗哉！張子其知此乎？程子以是言告朱子，朱子以程子之言告張子，張子曰：俞遂書之。

嘉靖癸巳七月既望

賜進士第北京戶部郎中程霆撰

贊曰：理義以養心，莊敬以養貌，可愛比諸珪璋，可仰等諸山岳。得由之，片言服人，得顏之，犯而不較，守雌而不守，維務拙而不務巧，蓋其所性，雖自天成，而其所養，實由於問學。噫，若而人者，其謙之初六君子也歟。

古杭六橋江山贊

澹軒序

張公名銓字萬良號澹軒余謂澹易簡之義古之道也余與公生今之世去古遠矣其澹薄無為之風可想望其高致而莫可見也已而公之軒胡為乎以澹名也意者處今之世見今之事厭其道之不古不屑于今而有志于古乎是蓋有志之士雖混之與世相周旋而其心獨揖古人而從之惡乎其不可也尼父有曰斯民也三代之所以直道而行也夫尼父之時去直道之世亦遠矣而以為斯民即直道之民者何也蓋天不變道亦不變世不古而心則未嘗不古也獨人莫知率吾性耳吾之性則古人之性也是故志古則古矣今夫孩提之愛親猶之古也自情竇既開而後始不古耳苟不喪其孩提之心澹然而無所欲即一古人也余觀今世猶有撲野之民居以茅茨服以布素聽其言陋而信情而中其辨行

實而不飾，僞人或厭之，以為不文。而吾猶取其近古焉。是故從先進者，此意也。公欲以澹者，其斯世斯人而從先進者歟。記曰：器用陶匏，以象天地之性。夫陶匏器之質者也，不事雕飾，澹然而不文。然則天地之性如斯而已，則夫世之逐々於欲飾，僞以鈞轂名趨華美，以為高致者，其喪天地之性盡矣。此風之行如流波，日趨日下，不可收拾，振作矣。何幸有如公者，中行而猶復乎。余聞公嘗作望椿樓，蓋孩提不忘親之心也。夫心不忘親者，則天機必深。天機必深者，其嗜欲必淺。夫嗜欲淺，則信乎其能澹也。昔林放問禮之本，尼父大之，公之號以澹，即林放之意。茲余之所大焉者也。求序於余，遂不辭而為之序。

嘉靖乙未歲仲秋吉日，紹興府通判古楓居士江軾撰。

立齋記

休陽南去一舍許曰漁灘有張義字存仁者故家子也一日以歲脩之室請名于企菴陳先生先生以為古人立名不同或因事而名有獨樂以名其園者有醉翁以名其亭者有遇雪以名其堂者名雖不同其皆有所自也名之其可苟乎又不自以為能而質之于余余雖未見其人已聞其名與字矣名曰義字曰存仁余即以仁義之道告之可乎蓋仁者人心之全德發則為愛之理推之則親親而仁民仁民而愛物以至慈祥愷悌無所不至義者人心之裁制發則為事之宜推之則尊君而敬長親賢而取友以至辭受取與靡所不當苟徒曰義而不曰仁又恐其為慘刻之義苟徒曰仁而不曰義又恐其為姑息之仁是必名而字之者有微意矣昔先儒周子有言曰立天之道曰陰與陽立地之道曰柔與剛立人

之道曰仁與義余以立人之道名張君之室使之名實相須食於斯則思曰吾何以立寢於斯則思曰吾何以立優游玩適於斯又思曰吾何以立是亦古人盤有銘几有戒瞬有存息有養之意也吾知張君必能感此奮發曰仁矣而益居夫仁曰義矣而益由夫義居仁由義則人之道可立矣因以名其齋且為之記其始末云

弘治十三年歲次庚申冬十月望日

賜進士出身大中大夫廣東左叅政致仕括蒼詹兩撰


樂善齋記

漁灘張氏休陽之右族也其地環而竒其俗清而厚士大夫相與
往還者靡不稱善正德戊辰予館于漁灘書屋寔張君時霖為教
子請也時霖時就予坐而談當世之務其容舒舒其色愉愉其意
氣每坦然自得予問之曰君似重有樂者君曰無所樂也予安分
以俟命於天耳彼徒營營以終日戚戚以窮年者是所不能也予
曰茲所以為樂也然其所樂者必有事焉予與君世契也請得舉
君之大槩而畧道其得樂之由矣予嘗見厥考志榮公性多暴君
事之卒至於底豫撫助諸弟不計利而尚義其在鄉也敬老而慈
幼強者服其德弱者懷其仁壯年挾重資遊江湖與人不驕矜惟
忠信是崇有大交易者皆求主之以一言之下兩情無疑悔尤好
調恤至有負債而疾者且為之求醫以全活之雖未仕也而以天

下為心觀其教子嘗曰讀書豈圖極科榮身要在濟世安民其立志嘗高人一等自幼至老口必擇善言身必擇善行交遊必擇善人見人之善雖微且賤必從而稱揚之愛慕之若將與之同歸其向善之誠遷善之速又非予章句之徒所能及是以行成於身教立於子信乎於人惠及於窮獨仰無所愧俯無所怍明無人非幽無鬼責焉往而不自得哉是則君之所樂者一言以蔽之曰善而已於是號其齋曰樂善夫善五常之本百行之源也全德之名也張君悉有衆善不可以一德名片長目以是而為之號宜也匪過美也其有所試矣或者曰樂人之情也善人之性也情性在人一也而奚獨羨乎張君予曰樂雖在人所必有然樂之不得其道匪樂也善雖在人所必有然善而不能存無善也夫所樂者善樂可久也善而至於樂善斯成矣張君其不可及已乎若夫世之以功

名富貴聲色玩好而為樂者事窮志沮物盡情遷甚則樂未幾而
憂已隨之其視張君之樂為何如嗟乎樂善固張君之行而兼善
與積善尤張君之志以其誠於教子者占之矣繼志者尚知所勉
哉予既為之號遂并為之說使為記之

正德三年歲在戊辰孟春之吉婺源江元輔書



和齋記

和君子之盛德也陰陽和而後雨澤降夫婦和而後家道成自彞
倫以至於庶物何者下以和而後為善然而成之極難夫人之情
莫不有好惡也有嗜欲也一有所偏則乖戾生矣和安可得哉故
聖人立教初不外性情以為道情出於性則無不善其或蔽於私
交於■氣則性不能主於內情之所自流矣故周子有剛柔善惡
之語而曰中焉止矣中者和也中節也中節則無惡自性學不明
雖素號經生學子而情不能不常失之偏於是天下之事是非得
失每有不得其平自非生質之美難乎以盡和之義也休陽張君
時澤謹厚和易平生無傾側險諛之行待人至恭而有禮事親必
得其懽心處兄弟終身無間言和氣益如也如時澤者可謂能得
生質之美矣暮年乃名其所居之室曰和齋是蓋因其平生所守

而且以垂法於將來也予觀張氏一門少長之叙不失內外之行
井然豈必皆得其生質之美蓋亦由上世祖宗垂法之善而人有
所漸磨激勸以成之也時澤之尊翁志榮大父以祥皆為鄉善士
其昆弟率宅心平恕宜其和氣萃於一門而不失為衣纓詩禮之
澤求之流俗可多見哉張氏後人舉能以此為式則所以大其家
聲而昌其族胤者豈舍此而得他哉時澤求予一言發其義予固
不能外君之所守與祖父之所作則者書之以為告蓋道不出于
彝倫日用之常古者自閨門以至於鄉黨自遜路遜畔之風熏之
為太和之氣皆是道也後世雖位乎民上者不足於相欺相制同
列之中一言之不合則肆為忌刻一事之不侔則陽怒而陰詆其
不和甚矣安得時澤名齋之意而反思焉則乖戾之心豈終無所
釋乎是為記

嘉靖癸未春二月上浣

賜進士資善大夫南京戶部尚書郡人胡富

撰

復齋記

聖人贊易於復而言見天地之心此以陰陽之象屬四時言之若
天地之心初無一息間斷故零落潰敗者自潰敗而生生者未嘗
不並行於其間然聖人必謂於復見者蓋天地之心雖無間斷然
其屬於四時之氣則有盈虛消長自其消長而觀故其說然矣因
復而見其心是爲體者不壞乃能貞下起元而流行不窮天地之
心在人則謂之仁仁在人心本如天地之心同無間斷但爲私意
所枯則全體不能以自存亦在復之而已故曰克己復禮爲仁復
之義大矣哉休陽張君時中以復名其所居之齋是盖有意於求
仁克己之事人之各倚於偏而不克合乎中之義者皆已私也在

仁發之則無不中故仁為本心之全德一有不中則不足為全德全德既復斯無徃而不中矣是所謂時中也然則復者求至時中之道乎君名溢溢者自滿之謂滿抬損謙受益君子所不居也是宜字之曰時中中則太過有所抑抑其所自滿之心而常見其所以不足則仁不可勝用矣求復之功無踰於此是則字君者固有微意而君之以復齋自勗又豈得無深意耶嘗問君之為人襟懷磊落素有奇節不為流俗媵阿之態義之所在沛然若決江河莫之能禦其處家庭父子兄弟之間熙熙如也此皆一仁之心充周發見非誠有得於復之功能如是乎况張氏之先文章宦業赫奕郡國至是百餘年間蘊而未發世澤之復亦固有在於斯時矣且予嘗過漁溪見其秀山相環綠水縈帶拂雲喬木鬱乎蒼蒼地運之復豈不亦有徵乎是則復齋之名固資以成已而張氏之大又將

於此為之兆也茲因徵予為記義不可辭遂書之

嘉靖甲午春二月朔承德郎南京戶部主事婺源江一桂 撰

方塘記

居山之下有方塘焉廣二畝許深不及尋水清而冽亭亭若鏡塘之南構屋數楹三隅周以垣雜以花木主人愛之以為翫脩之所因顏曰方塘或謂曰昔者孔子律天時襲水土仰觀俯察學於天地之撰主人其亦有取乎主人曰惡孔子何敢當也竊聞夫甘泉子曰塘也者風過之而紋之象生焉雨過之而澆之象生焉二者縱橫分合而經綸之象生焉泉受之而清之形成焉浸瀆之而潤之形成焉決而流之而澤之形成焉夫在天成象在地成形故聖人近取諸身遠取諸物以一德備用倫焉理焉渙天下之至文蓋取諸紋令聞廣蒼施於身不願人之文繡蓋取諸縠濟天下之雲

雷成天下之變化蓋取諸經綸介而能義得而不苟不溝瀆其身
蓋取諸清蔭滋遠近枯者蘇涸者膏蓋取諸潤溥乎均施溢乎德
愛加之於人蓋取諸澤是故紋以飾治穀以成章經綸以集事清
以立本潤以畜德澤以利用數者欲淑諸躬而未能一也吾何敢
擬孔子哉或者告於雙河子雙河子曰吾聞善辭者文以成志志
以成道君子取焉其方塘主人之謂乎請書為方塘記以復主人
主人謂誰姓張名天助字順之休環川之隱君子云

嘉靖乙未冬月青陽庠生王廷相國珍撰

東園記

夫要盟白藪非治世之資穎跡綺廊非御生之術達觀會遠在處而亨豈式捐之貳齊洵令昭之有自乃有右卜務而咲徃終之志崇孔墨則鄙山林之癯夫莘田野人乃誕假于殷賚太平元宰亦寄真于獨樂是一人而兩趨也此何以評焉張廷美氏蓋休之右族含章有求息恬而愉嘗於所居之東闢地為園日涉成趣旣以桑蓬未解罔恒于居因自紀其號曰東園誌不忘也頃過簾泉子于孤竹居道所謂東園者曰夫逕乃荒落厥有亮節著花野樹行無醜枝乃知地罔常殷景由人勝維余之營是園也前則雙溪縈帶以泳以方溪之外則柏峯來青寒暑一色蓋嘗引泉而池泉冽而池平築欄而藥欄深而藥茂剪芟識狗象之性蒔楸由養情之道若乃坐悵有雀聞聲躍鱗朝日而林霏開夕幽而泉石暝莓苔

載踞蕙蔭寫目賢人對座俗車罔停蓋巢甫託一枝之安冰壺重
壺公之隱雖潘城在繪自絕塵敲而晏市作剗終成真籟蓋吾將
卒吾生徜徉焉颯之乎洋之乎不知天壤之內六合之外復有可
樂者之足以易此也子喟然曰有是哉景無負於人而人自負故
隨地而出唯其所貞焉不有隱君子則耳目肺腸悉非自有囂之
塵土其眎丘壑為何物則曰吾方樂於用世夫奚有於此噫易所
謂賁于丘園而記稱艸澤留良者非耶矧張氏卜隱旁舍以怡其
身及其子孫蓋古謂使其子孫開門而出仕則跬步清朝之上
閉門而歸隱則俛仰山林之下又焉知不有後天下之樂而樂者
出以侈大先生之志矣乎則斯園之遺也因書而歸之爲東園記

清乙未夏四月之望錢

塘相文祥汝符

漁灘八景記

漁灘距驛路不一里周圍溪山回拱山多疊石或嵯嶢而青攢或
礧礧而壁立諦視之如蹲虎螭蛟形勢曲妙水自率山發源至是
蓄之爲潭爲沍淵淪激湜莫測其深灘瀨皆高瀉下風激之漉瀉
濺濺有海潮音若夫烟嵐出沒晴雨晦明春老而郊原綠雲寒而
泉幽天宇沈寥高下異趣則雖妙繪畫者不能形容之此景象之
大觀也而張氏世家焉張之先出漢留侯裔其後有閑公者由環
珠始徙于此傳十有九世矣今之志曰志通志榮者樂景物之勝
遂卽其地以爲八景因居之東兩山夾峙是中多佳木每曙光初
破林霏未開則日色已曛其上下名曰平林旭日居之南重巒
疊巘如屏障然旦晝間嵐氣鬱勝斷而復續曰疊嶂晴嵐西出山
趾有羅壁石潭深不得其底遇淫雨輒涌溢瀆沸若汾陰之漢水

無異至秋方澄鮮如練與天一色再宜月夜為觀曰羅潭秋月自
潭溯流而上一山峻巖橫截水面有古松一株拳曲偃蹇樛枝下
垂莓苔為之纏附乃以峭壁古松名之山極峻遊者側足累步攀
蘿附磴而後可上是有登虬龍踞虎豹之勢焉沿溪而還坻島間
有地廣可畝餘舊為水沮洳因築而庐之使鄉族群彥習學其間
曰漁灘書屋其下清溪沄沄洲渚隱見是為津渡之處曰古渡橫
舟溪左有鑿石而庐石佛者像甚古莫知其立何始曰龕亭石佛
又居之北由山徑抵于林麓有巨石環峙方廣為巖者二曰山麓
双巖然未有記之者而徵言於予夫景物因人而顯方愚溪未得
子厚居之特一荒溪爾盤谷未遇李愿斯亦一空谷爾及得二子
而臨之名遂顯於天下自氏之居茲土九幾世于今未有能為搜
剔竒隱乃遇君伯仲為之區別且將播之聲詩以揄揚於翰墨之

場則漁溪之勝詎不自此而重有問於時乎然則君之伯仲誠可
為林壑之增觀矣况君諸子若孫今皆偉然卓冠出乎流俗之上
必將有強志力學以取巍科於異日而克復上世功名之舊此又
山川之炳靈毓秀則人與地兩得之矣遂不辭書之詩八詠附于
後云

弘治庚申秋九月朔旦婺源江銓書于桂山草堂

環珠書樓四景記

江南之勝歸于白嶽白嶽之勝拱于環珠由環珠西望白嶽可十
里許東距邑紹則倍之世為張氏所居庶而且富匪直州人知之
凡四方來遊白嶽者皆知張氏之盛也惟嶽降靈人文秀出故其
族相與構斯樓而使鄉之賢子弟群讀其間且以四景名之予謂
環珠之景不止于四景名樓寓四教耳其曰杏苑春風仁教也其

曰梅窓霽月智教也其曰半畝方塘一源活水機教也仁以成己
智以成物機以入聖四景之時義大矣哉何也物與我同一景也
善觀景者不以物而以我則盈天地間皆物也物皆我也物我皆
景也物無盡歲景亦無盡歲也是故春風杏樹物物景也樓之左
所有者也君子則不以杏觀杏而以嘉觀杏故見春風之在杏見
吾心之元仁也於是有杏苑春風之景焉月上梅梢物景也樓之
右所有者也君子則不以梅觀梅而以我觀梅故見霽月之在梅
見吾心之智鑑也於是有梅窓霽月之景焉坎而為塘流而為水
物景也樓之前所有者也君子則不以塘水觀塘水而以天機觀
塘水故見塘之止水之流見吾心之動靜也於是有方塘活水之
景焉是景也收天下春於吾心天下之真景也程子得是景則吟
風弄月以歸朱子得是景有源頭活水之詠樓中君子得是景則

當吟弄夫程之風月深遡夫朱之源頭度幾梅杏不為長物而塘
水乃為真景象也不然則景自景於吾人意思無所關係矣亦何
取於樓與景哉遂書以為記

嘉靖乙未春二月朔郡人雪泉子江涯撰



環川八景記

環川距休寧縣治二十里先世有張氏曰明者始居之生子環有
惠澤及人土人遂以環配地為稱至後裔蕃衍復姓其地曰張村
今名猶兩存其地有名山相環秀水縈帶良田沃壤一望千頃宜
其虛氣綿長居之者皆享豐亨豫大之業人尤習為謹厚不事猥
薄蓋風氣使然也嘗以地之形勝據為八景其一曰石磴松陰以
居之後山多疊石如伏犀如馴象或寬平如几榻可羅壺觴列坐
數十人或陡絕如梯磴遊者側足于而上其間長松夭矯聳壑
昂霄當日光掩映則濃陰散布如屯雲然故名其二曰環川竹影
川傍脩然茂竹歲久益盛炎氛之所不到囂塵之所不入水光蕩
漾竹影為之倒浸過者煩襟盡釋徘徊久視而不能去居之東北
有潭淵然其水從源于懸崖會率山之麓入川潭水入丁川時

有蜿蜒潛其中歲旱土人植於潭畔則魚應立至亦有豐年因名
曰溪北靈潭居之西地名橋東建郵其中郵之後有三石鑪泉常
溢出冬夏不竭他鄉告旱而環川之田獨賴泉以溉因名曰橋東
聖井環川之原其入二十餘里東西山如蟠蛟蟄虬夾峙為谷山
間草木繁殖樵者日作暝歸常萃谷口歌聲振于林木遠近畢達
名曰谷口樵歌去環川二里許有地曰塘頭蔀屋數家皆漁者居
焉或垂綸或布網欵乃之聲時出于水雲之間以塘頭漁唱名之
其七為天井高臺居之南其山高出雲表上坦夷如臺臺有井渾
然天成無斧鑿痕水常瑩徹可鑒毛髮其甘如醴立臺上四望群
山雲煙浩渺金碧交映浮嵐爽氣若在襟袖其八為雲巖列障雲
巖為新安名山中有五老峯倚天而立復有鍾鼓碧霄天柱石筍
香爐諸峯皆以其形名也如天門及諸巖洞其險恠竒峻雖善繪

画者無以施其巧而實拱挹於環川景之大槩至是備矣里之能
吟者既各為詩發之而復屬記於予夫惟胸中有此丘壑而後能
知丘壑之美盖道與物為體仁者樂山智者樂水以道能體物不
遺也樵漁不離乎山水而未嘗知有山水之樂由仁智不足以自
存故道雖具於所稟非由問學終不能為已有也今諸君能上不
忘乎先世之所攸居以昭其貽謀之善斯足以語仁矣下不忍山
川之靈秀使之湮沒無聞一旦托之詠歌將畱以名四方而垂後
世斯足以語智矣由其有是仁智於中斯能隨類充之無適而非
道也不孝而能文乎然於以文之顯其地不若以人之重其地諸
君能知孝無止然因其所能者而加勉焉則大固足與地相高所
謂名四方而垂後世者不益大矣乎遂不辭書之以為諸君告且
以勗夫表者交相倣也時

嘉靖癸巳臘月念日婺源江銓元衡撰

祭唐別駕鼻祖弘公墓文

嘉靖十一年七月十一日旌德嘉會張鳴鳳率許衝盤瑤派詣初會譜祭祖

始祖皇考弘道府君

始祖皇妣汪氏夫人之墓曰物本天生人承祖脉竊維張姓綽

有聲烈祖家姑蘇官居江浙迺遷初門赫然閱源遠流長支分

派別吾旌後裔赤山瓜瓞蘭桂傳芳祖宗遺澤茲因脩譜會成世

謀親情愈篤人心胥悅千載竒逢萬季奕葉謹以牲醴拜奠幽宅

陰靈如在居然來格佑我後人光昭先哲尚饗

祭唐尚書游朝公夫人墓文

嘉靖十四年四月念七日旌德耳孫張永暕斯妣永芳等祭

鼻祖皇妣李氏太夫人之墓曰源之深者其流必長族之大者

其派必繁天下之族惟張為蕃吾寧著姓首稱旌張金吾苗裔潤

田發祥家有餘慶代有賢良

祖功

宗德姓顯名楊茲因領譜走奠黃壤祈靈於陰錫胤於陽仕享要路儒繼書香文風丕振科第循環宗文愈盛福壽無疆尚享

祭唐別駕鼻祖弘公夫婦墓文嘉靖十五年五月廿四日休邑環

德隆內外今古傳聲凡厥孫子仰賴生成派衍休邑環漁擅名本

源之念孰敢或輕時逮嘉靖訂祀宗盟統譜盛會咸曰莫京因消

吉旦叩告

靈莖薄儀致奠輸此虔誠伏惟 降澤愈遠愈宏尚饗

祭唐尚書游朝公李夫人墓文嘉靖十五年五月廿五日環珠澳

寵命榮加佳城大就其山也維清其水也維秀故子姓之繩繩多

致貴而致富碩士偉人多昭宇宙顧我環漁的派實均叨乎

蔭佑之德之恩天高地厚迺會譜于祁陽望佳城而奠伏鑒我誠

意增我福壽尚饗


關譜嚴議

譜之來古矣予和張氏譜昔人嘗修之矣顧今生齒之煩無累千百若鼯穆若稱謂若接引之儀漫不可定且各遼其居至有不識面目公如途人者大分罔明群用是懼懋仁元貞諸父乃相率啓局謂董修必推我宗一二公明端慤之士主之而憲與陽輝與焉又參以輿論輿曰可而後梓果我宗雖貧賤罔遺否雖當要途炙手可熱亦所弗班也夫安得而私古者固有史修國史者謂不有人禍必有天刑謂其罔公耳左氏育子長齒孟堅瘦死范曄赤死陳壽廢卒鑿齒虧躰正坐此也故韓退之避不任史責柳子厚劉夢得作書勉之退之避益固然則家與國雖異要之理一也家之譜雖謂之家史可也知道者豈罔知此而以私爲哉况董修如憲心共天日亦非私可干非所疑也非所疑也獨懼夫人心如面或

有貪得重賂鬻譜於非吾宗者吾先有靈當必殛之然譜各有號
某家領某號譜又各有紀矧所領者必推素所衆服者領之此憲
之始而懼而終莫其可無是弊也惟登我譜而爲我宗者盍相砥
礪無侈族巨無倚人夥無恃積久無詫流遠行務修業務勤能務
勸惰務勉怨務釋訟務寧名務逃實務求豪右務下強健務馴柔
脆務振商賈務良過失務更仕者務以忠爲戒毋徒靡斗斛業儒
者務以道爲宿毋徒媒青紫始而齊家中而治國終而平天下以
共成天地間完人而不貽桑梓羞則庶有光於是譜是譜之修亦
匪直爲文具而已是望。

告

嘉靖十四年乙未歲五月朔旦裔孫塘頭憲廷綱謹識



張氏統宗譜後序

粵自玄黃剝破生人齊醜姓氏未別角
齒言競犄歟休哉邈無尚已降而後世
人謀揜焉封典興焉夫始姓氏之稱達
於天下而剖席立門之風作矣然雖人
有異姓姓言異傳言故姬厥姓者孰非
公旦之苗裔姓厥姜者咸焉尚父之胤
嗣而子而如一微子武公之衍派曰篤

曰芊皆公滿鬻能之流支秩乎天親不
相假借犁然金液因有陵奪是故士生
斯際諂固可以無作亦不必作又降而
下攘立之謀羣起繼贅之風日熾節以
莒滅其國楚以季易其位嬴以呂代其
宗牛以馬蒞其祀匪自早如狄漢中其
誰不冒焉於梁公之祖而援物如崇韜
流者亦不免端拜於金公宰木下矣君

予觀此外駢厯面內悼厯心此譜之
作固時有所為而勢有所驅焉者也得
已哉張氏為祁門著姓先朝華胄忒
接夔龍當代人文雖追董賈矧其
徙居四方者隨在而有祁蓋才付一馬
耳舊旌有譜而生齒之繁不無澆漏
紀注之多多或混真贗厯彥憲借陽輝
諸宗重纂觀其采摭必公而盡序以必

辨而嚴文翰必實而字銀梓必則而整
分領必允而確藏貯必密而固蓋是
濬一出則其宿昔所脩者將不必俟於
刊公洛而是非之際有若宰衡之與阜
隸錢堅之典殤子倚賴之與黔婁陽文
之與敦洽彰之乎較矣既成以予素
忝姻好屬序諸末予嘗聞或者之論
謂宗法當立濬可無作吁宗法之立

特可為近宗通居者計耳施之遐邇則
踈矣張氏徃居四方凡如于處星馳林
立凡如于人始穆流換凡如于世匪有譜
焉則統紀不一統紀不一則源委無辨
源委無辨則情意因屬情意因屬則
大家用垂憲章之作是譜也或亦有
見於斯乎然未知其果能相勉於道以
求無忝於是譜否也又嘗考張之先

人名在史冊莫可殫述姑引其尤則
至忠如文成竟成亦劉之業至清如志
和莫奪箕山之節張之子孫也誠如事
君知效良之忠自脩知法味之清少而
習焉長而安焉不見異物而遷焉吁夫
斯至忝於是稽已矣蓋共勗諸
嘉靖乙未歲季春之吉

賜進士通議大夫四川按察司按察使以前

山西道監察御史巡按浙江福建廣

東奉

勅獎勞三次陞俸一級侍

徑筵官眷家味溪程昌書

